

乾隆大藏經



乾隆大藏經



御製

佛光恩照 三千大千 隨緣徧滿
恒沙法界 普度衆生 悉證菩提
身心安泰 年時豐稔 風雨調順
日月升恒 乾坤清寧 百昌蕃熾
上下樂利 中外協和 庶物咸亨
萬善圓成 情與無情 同登正覺
大清雍正十三年四月初八日

第七六册 諸宗部此土著述（一〇）

大方廣佛華嚴經論 四九卷

（卷一—至卷四九） 亦名：華嚴經論

解迷顯智成悲十明論 一卷

六祖大師法寶壇經 一卷

止觀大意 一卷

始終心要 一卷

法華三昧行事運想補助儀 一卷

集諸經禮懺悔文 四卷

十不二門 一卷

十不二門指要鈔 二卷

金剛鉈 一卷

大方廣佛華嚴經疏序會本演義鈔

二九卷（卷一至卷二三）

亦名：大方廣佛華嚴經懸談鈔會本

唐方山長者李通玄造……………一

唐太原李通玄撰……………七一

門人法海等集……………七三一

唐天台沙門釋湛然述……………七六三

唐天台沙門釋湛然述……………七七九

唐國清沙門湛然撰……………七八〇

唐西崇福寺釋智昇撰……………七八三

唐荆溪尊者湛然述……………八三九

宋四明沙門知禮述……………八五一

唐天台沙門湛然述……………八九九

清涼山大華嚴寺沙門澄觀撰述……………九二七

大方廣佛華嚴經論

唐方山長者李通玄造

大方廣佛華嚴經論卷第十一

唐方山長者李通玄造

世主妙嚴品第一之二

今釋初會中世主妙嚴一品如前十段科文中第一段明佛始成正覺於此一段復分爲二

○一釋經題目 ○二隨文釋義

○一釋經題目者何故名爲大方廣佛華嚴經世主妙嚴品第一解云大者無方義方者法則義廣者理智徧周義佛者智體無依住義智自在義華者徧法界無盡行義以行能開敷自他果故華是感果義開敷義嚴是莊飾義明初發心住位以十信中有作行華開敷十住位中妙理智慧果故復生無作十種行華常以法行互嚴用淨自利利他之道故



清刻龍藏佛說法變相圖

行爲嚴飾義世主妙嚴者以此初品有諸神天八部之衆皆爲世間主各將十佛世界微塵數隨身部從或但云無量來嚴道場此爲依衆成名也故云世主妙嚴又佛及菩薩皆爲世間主故以能主導衆生總爲世間主亦以初品總標一部一部都舉總有二百二十八衆形狀不同各各部類或言一佛世界微塵或十佛刹微塵或言無量以嚴海會故言世主妙嚴或以佛福報境界妙嚴依正亦得稱爲世主妙嚴爲如來亦爲世間主主導衆生故此爲依主得名品者均別義明五位及信心同異差降意類別叙進修生熟各有條貫次第分明令後學者自識本行進修不惑故爲品類均別義也第一者非是次第前後之第一爲法界門中無前頭在後之次第皆

是一時無二念同時顯著諸品之第一一多緣起同時之第一是名同時具足相應門一多相容不同門以十玄門及六相義通融品名亦如是可知不可如情所計故名第一

○二隨文釋義者從如是我聞至如是無量功德已來於中有七十一行經長科爲四分

◎十信法門第一

○第一從初如是我聞已下至始成正覺於中有八句經_{四十}總明斷疑成信分前之六字明結集聞經之主後之五句叙致如來得道之處義分爲三△一定傳教人△二定說經時分△三釋經文義

△一定傳教人者如三乘中大智度論第二卷所釋如來臨入涅槃時告阿難十二部經汝當流通復告優波離一切戒律汝當受持

告阿那律汝得天眼常守護舍利勸人供養
告大衆言我若住世一劫若滅一劫會亦當
滅語已雙林北首而臥入般涅槃阿難親屬
愛習未除心沒憂海阿泥盧豆語阿難汝是
守護佛法藏者不應如凡夫人自沒憂海諸
有爲法並是無常汝何愁憂又佛世尊手付
汝法汝今愁悶失所受事世尊今日雖在明
朝即無汝當問佛未來要事盧豆教問要事
有四一問如來在世親自說法人皆信受如
來滅後一切經首當置何言二問如來在世
諸比丘等以佛爲師如來滅後以何爲師三
問佛在世諸比丘依佛而住如來滅後依誰
而住四問如來在世惡性車匿佛自治之佛
滅度後云何共住阿難如教請問世尊世尊
答云經首當置如是我聞一時等六字爲句

二云比丘皆以波羅提木叉爲師三云諸比
丘皆以四念處住四云惡性比丘以梵檀治
之此云默擯若心輒伏爲說迦旃延經此云
離有無破我慢心又如五卷大悲經中阿難
請佛云何結集法眼佛告阿難我滅度後大
德比丘應如是問世尊何處說大阿陀那等
經汝應如是答如是我聞一時佛在摩伽陀
國菩提樹下初成正覺說法乃至娑羅雙樹
間說如是等二十餘處所說之經佛自重教
阿難結集如是是故此六字句義佛教立故
斷後聞經者疑知非是他餘人說故亦非阿
難自說故依涅槃安立如經初准科文從如
是我聞至始成正覺有八句依五卷經說令
斷衆疑一者從如是是一句我聞是二句一
時是三句佛在是四句摩竭提國阿蘭若法

菩提場中此之三句義唯是一但陳一處三法是一并始成正覺爲六句是故如是我聞一時佛在菩提場始成正覺總爲六句今言如是者如即如佛所言是者是佛所說簡非異說兩名相順契信不殊明真是佛說非阿難自說亦非魔梵所說又我聞一句是阿難從佛所聞非轉轉傳聞故亦非是非人所制故又非如外道經書青鳥銜來石崖崩得是斷疑成信分如真諦三藏云依微細律阿難當昇法座結集法藏之時其身如佛具足相好衆見此瑞遂生三疑一疑佛大師從涅槃起更爲衆生說法二疑他方佛來三疑阿難轉身成佛今爲除此三疑故安立六字是阿難自稱如是之法我從佛聞知非是佛重起所說法亦非他方佛來又非阿難自身成佛

但以法力故令我似佛是故下高座已復本形以此義故以此六字用斷衆疑問如阿難既是如三乘中說是佛得道夜生年二十方爲佛弟子其二十年已後經是親聞已前傳聞故轉法輪經云阿難結集時自說偈佛初說法時爾時我不見如是展轉聞佛遊波羅奈國爲五比丘衆轉四諦法輪故知已前非親聞故答薩婆多論云阿難爲佛作侍者時請願言願佛二十年中所說之經盡爲我說勿與我故衣及殘食將知此也是親聞又如涅槃經云阿難多聞士若在若不在自然當解了常與無常義又阿難得覺意三昧佛所說經遠近常聞此已上阿難傳法並是三乘經中所說如此大方廣佛華嚴經傳法阿難非如上說 夫天中之天十方調御化儀主

伴豈是小緣自非器類齊肩示陰陽而影響
三世窮劫一念而知無盡古今常如即夕今
以三乘情見延促始終者未可詳其傳教之
主今此華嚴經明傳教主伴者皆是神洞玄
源道齊智海如文殊普賢互爲師範者之所
爲也豈論生時年歲作前後之見如是佛出
興世轉法輪時如來以性海大智之印印衆
生情欲爲文字於一音中無前後際一時普
印隨樂不同各隨自心所樂之法皆得聞之
設阿難示行傳教之主伴者是普賢行海隨
器高低出沒任流依根現跡皆不得以三乘
定例同已凡夫識達聖詮簡權從實如上所
說並是聖賢密潛同事是應三乘權化未爲
了教如阿闍世王懺悔經有三種阿難一阿
難陀此云慶喜持聲聞法藏於上二乘隨力

隨分二阿難陀跋陀羅此云慶喜賢持中乘
法藏於上大乘隨力隨分於下小乘容與兼
持三名阿難陀婆伽羅此云慶喜海持菩薩
大乘法藏於下小乘容與兼持此者亦是三
乘中傳教阿難未爲實教如是華嚴經傳教
阿難者正是阿難昇高座時身同諸佛一時
頓演四乘等教隨根總結集即阿難與佛體
同不殊此釋亦不違道理又如涅槃經云阿
難所未聞經弘廣菩薩當爲流通若望此經
非三乘所知即此弘廣菩薩傳教非謬今此
稱如是我聞者弘廣菩薩也又大智度論云
是文殊師利稱如是我聞以彼論中云文殊
師利佛涅槃後四百年中時文殊師利猶在
世間故又如智度論云文殊師利與阿難在
餘清淨處結集摩訶衍藏如上所釋總是聖

者隨方便言若以大體論之總是如來文殊師利普賢菩薩隨事之行故設言三身阿難亦復如之總是佛自普賢行中隨根方便隨器高低故已上定傳教人竟

△二定說經時分者略立十種說教前後不同 一如力士經說佛初成道一七日思惟已即於鹿園說法 二如大品經說佛初成道鹿苑轉四諦法輪無量衆生發聲聞心乃至獨覺心大菩提等心不言時日 三如法華經說三七日詣鹿園說法 四如四分律及薩婆多論六七日方說法 五如興起行經及出曜經七七日方說法 六如五分律八七日方說法 七如大智度論五七日方說法 八如十二遊經說一年不說法 九如今唐朝藏法師決定將如來成道定二七

日說華嚴經已上見佛說法前後不同皆是隨自見佛說法前後不同非是依本法界成實之說 十今通玄依此華嚴法界門定說法時分還依本教定其時分總不如上如來依真出世利物還令至真若也各自隨逐自情永劫迷輪苦趣乖真逐妄佛意不然經自有文何須違教逐權背實障業何休如十定品說如來於剎那際出現於世入涅槃總無時也言剎那際者猶是寄言爾以無時即一切時出現一切時說法一切時涅槃爲寂用無礙故隨衆生心現故又如法華經吾從成佛已來經無量阿僧祇劫以無時可量故言無量此爲佛說法時也以此爲定不逐世情遠思爲無量之想也以無時是佛說法時也以本教說本時本時者法界無時也如十定

品以利那際出現住世入涅槃者意言時無可移如利那際總明法界無可遷移時也今定說經時分只是三世古今情盡以爲本說法時也不可依前權教逐情引接之說

△三隨文釋義者從初六字八句斷疑成信分中依大智度論云如者順也又是者印也即印順信受故言如是如是總舉一部文義即指已所聞之法故故云如是又依長耳三藏約三寶釋一約佛謂如佛所說是我所聞是佛所說又依藏法師釋約法云謂如我所聞是佛所說又如稱理教是我所聞又今通立約法釋云如者諸法如故即是佛故言如是以法界大智之真我聞佛說法界大智之真經故言如是我聞即明師弟體一此約華嚴法界門釋爲明初發心因果理智不異佛

故又一切法如也以法體如所說法者及法亦如以法界智是所聞之智智亦如故故言如是心境不二方聞佛所說經若心境有差不可聞佛所說亦復不能信順領受故我聞者是法界智之真我還見法界智之真佛還聞法界智之真經總法界智之真人互爲主伴還化法界之真衆生悟入法界智之真性故故言如是我聞夫佛日出興化羣生之軌範所有結集傳經之主伴自非氣類齊光道相知而利物以弘廣菩薩文殊師利如來自行普賢等傳持聖教是實也非實是三乘種智等人能傳教乎設是阿難亦是同流皆以常樂我淨大智慧之真我聞如來大智所說之真經非假我故皆如佛知見故言如是我聞不同涅槃具四緣和合之所聞故云何四

緣一耳根不壞二聲在可聞三中間無障礙
四有欲欲聞如是之聞是凡夫聞故又凡夫
及三乘有十種緣方得聞一本識爲依二耳
識種子爲因三末那爲染汚依四意識相依
五自類耳識爲無間依六耳根不壞爲境根
七作意欲聞八境界爲所緣緣九中間無障
礙十境近在可聞如是之聞是凡夫及三乘
有限量聞不同此教菩薩以徧法界大智慧
爲聞更無能所以一圓明智鏡一念普聞三
世劫無量等諸聲皆不如上說凡夫及三乘
計無量劫者是法界聞中一念一時聞以智
無裏外一時聞故一時者依梁論一時有三
義一平等時無沉浮顛倒故二和合時謂今
聞能聞正聞故三轉法輪時即正說正受時
如依諸古人說正說法華經時非是說餘經

時正說金剛般若經時非是說餘經時名爲
一時取正是說當部經時名爲一時今此說
大方廣佛華嚴經時即不爾即是以法界體
寄言一剎那際出世及涅槃以一言音一時
徧周十方國土轉法輪時名爲一時非如上
說一時之義佛者覺也覺有二義一始覺二
本覺此佛者覺無始終三世障盡名之爲佛
不如權教有出世涅槃有始終故又佛者大
智度論中有四義一名有德謂婆伽名德二
名巧分別婆伽名分別婆名巧故三名有名
聲婆伽名名聲婆名有故四名能破姪怒癡
婆伽名破婆名姪怒癡故又佛地論說有六
義頌云自在熾盛與端嚴名稱吉祥及尊貴
如是六種義差別是故總號婆伽婆在者在
何處所在有二義一指事二舉法指事者在

摩竭提國且指其國二舉法者在何處在法界即事即法界無二故爲法界無中邊大小彼此故又摩竭提者此云不害國摩者云無竭提云害總云無害國又云摩者不也竭提者至也言其此國將謀兵勇隣國敵不能侵至又摩者徧也竭提云聰慧此國爲多有聰慧人徧其國內故又云摩者大也竭提者體也謂五印土中此國最大統攝諸國故云大體也又此國王不行刑戮其有罪者送置寒林中爲明佛大悲以處表德故阿蘭若法此云寂靜處寂靜有二義一事二理一事者在摩伽陀國尼連河側漚樓頻螺聚落中去人間五里一牛吼地得阿耨多羅三藐三菩提此處有一萬道場神常在其處一切諸佛示成正覺總在其中表如來萬行圓滿中道無

徧故此處是閻浮提之中心故二理者即一切法自體靜故即動而常靜故菩提道場者有二義故一事二理一事者如前尼連河邊二理者徧法界也法界無邊道場亦無邊於一切刹皆示成佛故如世間場簡穢故法場治惑故示現成佛治衆生惑故此場依主釋爲佛在其中現成道故依主得名爲覺場也始成正覺者古今情盡名之爲始心無所依名之爲正理智相應名之爲覺得如是法名之爲成又自覺覺他名之爲覺已上釋八句中斷疑成信分竟

○第二莊嚴道場分者從其地堅固已下至妙音迴暢無處不及於中有二十六行半經四百五十二言總明歎佛依正二報及菩薩神力莊嚴道場分此如帝網之重重於此一段文中

明如來本性中行四種因感四種果報於一心性中有四種因行十波羅蜜又於其中各得十種莊嚴何者爲四種因果

△第一明法身因報得金剛地果經云其地堅固者是也其地上有十種莊嚴即以十波羅蜜以成依報金剛地爲正報何者爲十種莊嚴 一以法性中大智以爲檀體即一行中具十行總圓故以此經宗一行即一切行主伴恒圓滿故故以寶輪圓滿用嚴金地明一即一切故 二以寶華以嚴金地明其性戒清潔猶如妙華開敷菡萏令人樂見發生自他善因果故 三摩尼寶以嚴金地摩尼者此云離垢寶也以忍行清高心無諸垢所招依果故 四諸色相海以嚴金地以精進波羅蜜總該衆行能招自他果故以招報故

得諸色相海以嚴金地 五摩尼爲幢莊嚴

者明定體恒淨無傾動故所招果也禪波羅蜜能普寂故 六幢常放光明及出妙音莊

嚴法界者明定能發慧慧能說教以爲依果

以嚴虛空又明第六波羅蜜空慧滿故 七

寶網莊嚴者明方便波羅蜜成就大悲覆護

衆生施教行故所招依果爲明七住七地等

成大悲法門故施教行之網漉出衆生安置

於大般涅槃之岍故因行如是依果亦然

八妙香華纓垂布莊嚴虛空此網向下懸垂

之飾也明第八願波羅蜜以任運之大智入

俗益生教行所招依果也如十地菩薩七地

已前作七度鍊真金轉令明淨喻八地即作

種種莊嚴華鬘喻故 九摩尼寶王變現自

在莊嚴虛空者明第九力波羅蜜九住及九

地等爲大法師說法自在所招依果故明十住第九十行中第九十迴向中第九十地中第九總明法師位說法自在所招報故十兩寶及華以嚴金地者明十住十地等大智法雲雨衆法寶及利衆生行普周徧故所招依果從第九摩尼寶變現自在即兩十地法雲之寶者明住地地五位相即故

△第二明萬行因果者其如來自行普賢行爲因所招寶樹行列莊嚴金地周徧十方爲依果故經云令此道場一切嚴具樹中現像者明覺行相徹體用徹故此總陳樹上莊嚴後別舉菩提樹一箇用明衆樹亦爾其菩提樹有十種依果者常以金剛地爲正報其上莊嚴爲依報又如來身爲正報金剛地及地上一切莊嚴爲依報今樹者以如來行爲因

因行招報樹爲依報又樹上其樹金剛爲身金剛爲正報幹枝條葉華果爲依明以行樹法華智果慈悲之業以十波羅蜜爲枝幹法身以爲其莖而隨十行之上報得十種依果莊嚴何者爲十 一金剛爲樹身以法性爲檀行體故所招金剛樹身依果爲明一切行從法性生故是故以金剛爲身云樹高顯者如下十地品說十地菩薩行中依果所招之樹其莖周圍十萬三千大千世界高百萬三千大千世界如十地菩薩行中依果尚自如是況復如來 二瑠璃爲幹者生枝以上爲幹向下無枝條處爲樹身明自行淨戒爲因外招瑠璃爲樹幹故直出者爲幹傍生者爲枝枝上生者爲條明萬行隨流以淨戒爲體以無染故皆是法性身隨流而無染淨行果

所招報相 三衆妙雜寶以爲枝條以嚴其幹者明純雜萬行對緣成忍能利自他所招依果故 四寶業扶疎垂蔭如雲而嚴其條者扶疎者蔭映得所明精進波羅蜜自利利他教行法門覆護得所不省不繁恰中故外招依果樹葉以嚴覆蔭衆生得所故也 五寶華雜色分枝布影以嚴寶樹者明如來以無量三昧方便隨流利生影應一切衆生之行隨類現形外招其華以嚴寶樹亦明三昧能開敷故 六智慧果故報得依果以華爲嚴摩尼爲果與華間列者明以定華能敷慧果寂用自在故含輝發燄者慧能照燭自他故所招依果華果間嚴 七樹出光嚴者明方便波羅蜜以大悲心處纏同事方便破闇故所招依果故樹出光嚴 八光出摩尼者

明第八願波羅蜜與智自在所招果故 九摩尼寶內有諸菩薩俱時出現者明第九力波羅蜜以無功智身出應隨緣利含識故九地菩薩爲大法師所招依正本末相似以行果能招樹報樹出菩薩衆還明本行明依正交叅具總別故爲明本行萬行報得樹嚴樹出菩薩以明因果徹故以明摩尼寶中現菩薩身雲者表八地無功之淨智九地出行設教利生故以菩薩是行樹是行中報得還於樹中出菩薩故 十菩提樹恒出妙音說法莊嚴者明如來十住十地等智波羅蜜以大法雲雨法雨故所招依果

△第三明大悲因果者以如來大悲爲因如來所處宮殿爲依果此中有五種德而共成之一如來大悲含育德以成其宮 二以